



Uunga siunnersuut: Peqqinnissaqarfiup iluani napparsimasut maalaaruteqarsinnaanerat taarsiiffiqarsinnaanerallu pillugit Inatsisartut Inatsisaat.

(Peqqissutsimut Naalakkersuisoq)
(Siullermeerneqarnera)

Demokraatit maannangaaq Naalakkersuisut siunnersuummut manna qutsaviginiarpaat, Naalakkersuisuusimasunit aningaasalerneqarlunilu aallartinneqarsimasoq, saqqummiuummassuk. Siunnersuut isumaqatigaarput imalu oqaaseqarfigissallutigu.

Inatsisissatut siunnersuutip massuma siunertaraa innuttaasut napparsimasullu peqqinnissaqarfimmi kukkusumik passunneqarsimanermi inatsisitigut illersorneqarnissaat. Siusinnerusukkut naammagittaalliornerit tamarmik suliarineqartarsimani napparsimasut innuttaasullu isaanniit isigalugu ersarittanngillat paatsuunganarsinnaallunilu, akuttunngitsumillu ukiorpassuarni amerlavallaartunillu paasisaasaanngitsunik akissutinik, aammalu akissuteqartannginnermik kinguneqartarsimalluni.

Taamatutaaq passunneqarnermi kukkunerit naammagittaalliutinullu qisuariarfigineqannginnerit inuit naapittarfianni takussaaqaat, tamakkulu aamma innuttaasunut/napparsimasunut tamatsinnullumi peqqinnissaqarfitsinnut tatiginninnerput sunnerneqartarpoq. Tamannali unittariaqarpoq. Innuttaasunut napparsimasunullu ukiorpassuarni paatsungatinneqartarnerit unittariaqarpoq, saaffiginnissutaasartut naammassineqanngitsut akissutillu nammassineqanngitsut aqqittariaqarpavut. Tamakku peqqinnissaqarfimmit sullinneqarnermut innuttaasut tatiginninniarnannut sunniimmata, innuttattalu inatsisitigut illersorneqarnissaat sumiginnaratsigu, iliuuseqarfigissallutigu pisussaaffigaarput. Taakku saniatigut qulakkiissavarput, innuttatut napparsimasullu naammagittaalliutiminnut sukkanerusumik ersarissumillu akissutisarnissaat, taamaasillutik inuunerminnik pitsaasumik ingerlariaqqissinnaanngoqqullugit.

Taamaattumik qinigaaffimmi kingullermi Naalakkersuisuusimasut ajornartorsiummut tassunga isummereernikuupput, aningaasatigut sinaakutissat 1,5 millioinit koruuniniit 7 millioinit koruuninut 2022 allarnerfigalugu qulakkeerlugit, aningaasanut inatsimmut 2021-imut suliarineqarnerani. Siunertaasimavorli inatsisissamut siunnersuut maannakkut ukiaanerani saqqummiunneqassasoq. Taamaattumillu maannakkut Naalakkersuisuusut nersualarlugillu qutsavigissavagut tassunga suliniummut pingaartumut aningaasatigullu qulakkeerneqareertumut isumaqataammata.

Ajoraluartumillu – ilisimavarput, una inatsisissatut siunnersuut pissutsinik assigiinngitsunik pissuteqartumik pisariaqalersimasoq. Pissutsit ilaasa ilagaat Peqqinnissaqarfiup amerlasuutitigut ilungersunartunik annertuunillu suliakkerneqaleraluttuinnarnera, sulisut akornanni taarsaannerujussuaq pissutaalluni; assaat kissalaartut pisariaqartut amigaataanerat suliassallu annertusiartortut ajornakusoortullu kukkunernik kinguneqalersinnaanerannik. Taamaattumillu oqanngisaannassuugut, uuma inatsisissatut siunnersuutip kisimi napparsimasut peqqinnissaqarfimmut isumalluarnerat tatiginninnerallu



qulakkeersinnaagipput. Qulakkeerniartuassavarput, inuttut piujuartitsinissarput pikkorissunillu sullissisoqarnissarput, innuttaasut napparsimasullu paaqqutarineqarnissaat passunneqarnissaallu pisariaqartoq atuuttuaannartinniarlugu. Tamanna kingusinnerulaartukkut uterfiggissavara.

Ajoraluartumik COVID19-ip ukiuni kingullerni Namminersorlutik Oqartussat allattoqarfii annertuumik kalluarsimavaa, tamassumalu kingunerisimavaa, suliniutaasut allaffissornikkut politikikkikullu piffissaq sivisunerusoq sullissiniarnermi atorineqarneranik. Tamanna ersarissumik 2020-imut nunatta karsiata naatsorsuutaasa suliarineqarnerani takuneqarsinnaavoq, ersarissumik takuneqarsinnaammat naammagittaalliortarfik aammalu tassunga taarsiiffigitinnernut atuisoqanngilluinnarsimammat. Taamaattumik Inatsisartut Naalakkersuisullu kajumissaarusuppagut eqeersimaaqqullugit minnerunngitsumillu akisussaassusilimmik, pingaarnersiuiinermilu oqimaaqqatigiinnerusumik peqqinnissaqarfiup siunissami sulisunik pisariaqartitsineranut, aammalu coronamut suliniuteqarnermut tunngatillugu.

Assersuutigalugu innuttaasut amerlasuut coronavirusimut misissoraangatsigit, annertuumimmi suli mianersortuartassalluta oqariartuuteqartaratta naak, innuttagut affai sinnerlugit coronamut akiuussutissamik kapitissimareeraluartut. Soorlu coronavirusimut misissortinneq ataaseq 1.000 koruuninik akeqartoq, naatsorsuipallakkuttalu ullormut inuit 1000-it misissugassamik tigusiiffigigutsigu, tamanna akileraartartut ullormut 1 million koruuninik akiliisinnaapput. 1 million koruunit ukiumut kræftimut katsorsaanssamut annertuumik sunniuteqartussamut atorsinnaagaluarpavut, inuppaaluit paaqqutarineqarsinnaallutik.

Tamanna assersuutaavoq tigussaasoq isumaqarpungalu, pingaartuusoq, eqqarsarluarnissarput. Taamaattumik eqqarsarluartassaagut, Peqqinnissaqarfiup suliaanik tulleriarileraangatta, uatsinnut tamanut akisoqisumut. Qulakkeertariaqarparput peqqinnissamut suliniutit allat unittuunnginnissaat, aammalu, peqqinnissamut inatsisit tungavigalugu peqqinnissamut suliassat pingaarnersiorneqartarnerat, innuttaasut qulakkeerlugulu toqqissisimassutigissagaat, aammalu piffissami sivisuumi tassanngaannaq suliassat tikiuttut suliarineqartartut. Tassunga isumaqarpunga, ajoraluartumik ilisimasimagipput piffissami annertuumi ukiuni kingullerni, aammalu pissusissamisoortumik paasinartumillu pingaarnersiuisarnerit ingerlanneqarsimasut.

Taamaattumik aarlerissutigaa, piffissami aggersumi Dronning Ingridip Napparsimavissuani annertuumik takullugulu misigissagipput suliassat unaminartut annertusineri, aammalu innuttaasut napparsimanermi peqqiilluuteqarnermiluunniit peqqinnissaqarfitsinnut saaffiginninnissaminnut tunuarsimaarsinnaasut, taamaaliornikkullu imaassinnaammat nappaatit, soorlu assersuutigalugu kræfteqalissutaasinnaasumik, kingusinaartumik paasineqartut, ajoraluartumillu inuup inuuneranik kinguneqarsinnaasut. Tamannami coronaviruseqalinngitsorli ajornartorsiutaareersoq ilisimavarput, innuttaasut kingusinaarlutik nakorsiartarnerat, tamannalu iliuuseqarfiginiarlugu aningaasanut inatsimmi 2021-miit atuutsilersussami kræfteqalertarneq siusissukkut paasineqartarnissaa suliniutigalugu Naalakkersuisuusimasut annertuumik suliaqarmata. Tamannalu maanna coronavirusimik akiuiniarnitsinni suliniut ipisinneqannginnissaa qularinngilara tamatta kissaatigigipput, ilami Kalaallit Nunaanni, naak coronavirusimik napparsimagaluarlutik annerusumillu peruluutaangitsumik napparsimasartut paasigatsigu. Taamaattumik uagut – tamatta – nukiit mianersorluta atussavagut eqqarsaatigalugulu suut, innuttaasunut



pingaaruteqarnerunersut, aammalu peqqinnissamut aningaasartuutigut sapinngisamik tamakkiissumik peqqinnerulersitsisussanut atorpeqartarnerat eqqumaffigissagipput.

Una Inatsisissatut siunnersuut Ilaqutariinnermut- Peqqissutsimullu ataatsimiititaliamut ingerlateqqipparput, taakkuninggalu oqaaseqaateqarluta ataatsimiititaliaq sulilluarnissaanik kissaallugu.